

四庫全書

集部

欽定四庫全書

集部
幔亭集卷八

詳校官中書

臣徐志晉

侍讀

臣孫球覆勘

總校官庶吉士

臣倉聖脉

校對官主簿

臣汪日贊

謄錄貢生

臣李玉瓚

欽定四庫全書

幔亭集卷八

明 徐燾 撰

七言律詩

冶城懷古

千里山河霽色開，清秋臨眺獨徘徊。
虹橋隱隱龍江繞，雁塔雙雙雉堞迴。
落日寒潮螺女渡，冷烟衰草越王臺。
當年霸業俱塵土，愁聽荒原鳥雀哀。

冶城日落亂啼鴉城上烏烏起暮笳四野桑麻八閩郡
千村烟火萬人家無諸古殿傷青草南宋行都想翠華
人事已非湖水在年年風雨長兼葭

垂虹橋別顧學憲先生

垂虹橋畔水悠悠無數青山起暮愁桐葉戰風驚遠夢
蘆花含月隱孤舟吳江露下丹楓冷震澤雲寒白雁秋
此去風帆何處泊相思明日隔滄洲

夜聞吳女誦經

佳人何意悟禪那夜誦金經數百過窈窕相中疑大士
妖浮聲裏半彌陀還於女伴歌吟懶自與尼師結拜多
謾道西隣歸彼岸此生無計渡恒河

擬咸陽懷古

咸陽禾黍正離離人代興亡豈有期廢殿秋風秦劍戟
荒山夜雨漢旌旗茂陵空灑千行淚渭水長流萬古悲
何處登臨最惆悵樂遊原上日斜時

愛妾換馬

如燕如龍戶外嘶行雲行雨意悽悽青蛾永別黃金屋
赤兔新翻碧玉蹄雖有飛騰空冀北更無歌舞出樓西
他時紫陌相逢處望見銀鞍不住啼

雙眉顰蹙四蹄翻皂櫪無聲被不溫憔悴難忘當日寵
悲鳴猶戀主人恩強隨夜月登妝閣愁逐秋風出塞垣
金埒玉樓遙騁望幾多汗血幾啼痕

夏日靈山堂避暑

灌木陰中共倚欄飛來蒼翠落簷端滿林花雨諸天近

六月松風一座寒
鳥入亂雲翻影滅
蟬當斜日送聲殘
相逢正有淹留興
其奈踈鐘報夜闌

越王臺懷古

山河如故霸圖休
臺下空江水自流
歲久莓苔生廟壁
日斜葭莢滿汀洲
旌旗影滅秋風冷
劍戟聲沉暮雨愁
莫道釣龍人已遠
精靈還向夜深遊

寄長溪史使君德明

少年作郡到長溪
五馬時從柳外嘶
官舍鳥啼春寂寂

公庭吏散草萋萋
山城夜月聞弦誦
瘴海秋風絕鼓鼙
日向習家池上醉
兒童爭唱白銅鞮

送林熙工陳汝翔陳伯孺潮上人遊武夷

津亭落木已紛紛
無那離情對夕曛
極浦風烟隨鳥盡
寒潭秋色與僧分
蘭舟獨載千峰月
竹杖同扶九曲雲
此日江離正堪采
為余遙薦武夷君

秋日陳汝大載酒林氏水亭

滿天秋色雁邊遙
載酒芳園暑氣消
柳外鳴蟬寒度雨

竹間小浦暗通潮半林綠樹迷危堞一帶蒼山隔斷橋
此地相逢不沉醉更於何處避塵囂

送老卒還鄉

少小從軍出玉門蕭蕭白髮返丘園塞垣此別休回首
舊路重經更斷魂殘橐只餘孤劍在故鄉知有幾家存
古來征戍生還少何必封侯是主恩

經古戰場

蕭條殘壘不勝悲此地曾經幾亂離恨血尚餘春草裏

游魂多出夕陽時
瀟瀟寒雨聞刁斗
漠漠陰雲見羽旗
滿路干戈愁轉戰
胡笳休向馬頭吹

贈顏廷愉將軍

姓名曾冠少年場
逆旅相逢意慨慷
能以三都雄藝苑
還將一劍倚扶桑
燕臺擊有荆軻筑
粵國游無陸賈裝
為愛琅邪門下士
如君詞賦獨升堂

詩名久已動長安
此日仍登上將壇
投筆恥為秦博士
橫戈今作漢材官
常拚一命酬知己
不愛千金贈所驩

莫道書生無遠畧東封函谷有泥丸

秋日居法雲寺喜漸上人見訪

門掩蒼苔一徑幽白雲應為遠公留
踈鐘隱隱諸天暮殘葉蕭蕭滿地秋
竹院又逢今日話芝山猶憶舊時遊
此中傳偈多禪侶何必浮杯到沃州

秋夜同顏廷愉黎廷彬二將軍王元直秀才觀
微上人興公舍弟集鄧道鳴閫帥行署賦得
紫薇夜漏同用花字

虛堂良會寂無譁忽聽譙樓鼓亂搗響入招提隨斷磬
聲傳睥睨雜悲笳共占此地星文聚莫問中宵斗柄斜
滴盡銅壺天似水月光初轉紫薇花

顏廷愉旅館夜集聞歌

越王城裏起西風旅館相看興不窮詞客交情聯縞帶
美人幽恨寄絲桐當筵夜靜燈花綠隔寺秋深落葉紅
此去豈愁逢醉尉踏歌齊向月明中

陳廉訪先生七十初度

投簪久矣老滄洲共說神仙是隱侯
衣剪烟霞輕豸繡家營雲水比菟裘
數莖瑤草千年綠九月黃花一徑秋
不用尋仙訪真訣姓名元已注丹丘

送陳道育遊吳

西風蕭瑟不勝愁無奈同心賦遠遊
一帶青山吳苑暮滿林黃葉太湖秋
離魂渺渺隨鴻斷鄉淚潺潺逐水流
況是天涯搖落後豈堪為客獨登樓

得李伯實太學書知其移家金陵却寄

天涯久別正銷魂
忽爾開緘見淚痕
東粵梅花留去客
南朝芳草待王孫
春風八口依京國
夜月千山夢故園
往事傷心君莫問
臺城烟柳易黃昏

同王元直讀書法雲寺賦贈

精廬高傍玉蟬峰
采葛歌成意更濃
把臂共揮花下麈
連牀同聽佛前鐘
覆棋憐爾如王粲
倒屣何人是蔡邕
白首交期誰得似
寺門遙指歲寒松

送林叔度遊支提寺

何時蹤跡別壺公，歲晚看山過霍童。
客路杖藜殘雪裏，人家雞犬亂雲中。
鐘聞下界諸天近，寺隱深林一徑通。
遙想空門多勝事，半龕明月幾僧同。

贈別康孟擔

一丘栖隱近何僊，不異龐公在漢年。
名混布衣堪傲世，齋供繡佛可逃禪。
尊前有客同浮白，身後誰人識太玄。
此別相思勞夢寐，壺山雲樹鯉湖烟。

送陳元凱明經北上兼覲省

津亭落葉點衣斑
斗酒臨岐動別顏
江上流澌前嶺雪
馬頭晴樹隔淮山
征途歲晚鴻聲斷
上苑春深草色閒
此去趨庭驩不淺
可無飛夢到鄉關

江干分手動悲歌
迢遞關山歲杪過
獨夜懷人魂夢遠
中年知己別離多
車驅微月寒登隴
馬踏殘冰曉渡河
若遇長安舊相識
為言生計久蹉跎

送葉進卿太史還朝

星軺萬里上長安
歲晚關河雪欲殘
劍珮晨趨金闕霽

絲綸夜草玉堂寒千條御柳鳴鞭過五色宮雲拄笏看
幸有同心在霄漢清時無用賦猗蘭

陳汝大六十初度

年少曾窺寶笈文老來高臥謝塵氛吟邊野興隨青草
世外餘生付白雲大藥已傳龍虎秘閒身應混鹿麋羣
桑弧正及黃花節一度花開一壽君

送人之邊

萬里橫戈賦遠征天涯去住不勝情隔河獵火秋調馬

古戍狼烟夜列營沙磧春深無草綠邊城亂後少人行
客中知有還鄉夢莫聽孤笳月下聲

漠漠黃塵匹馬孤馬頭今去向飛狐望鄉臺畔無青草
敕勒城頭有白鳥滿路寒霜朝倚劍一天明月夜吹蘆
單于莫近陰山獵南國書生正棄繻

無題和李義山

香燼金猊燭散風月沉西嶺水流東雲迷洛浦人何處
柳暗章臺路不通遠岫似凝眉上翠守宮猶染臂間紅

淒涼往事休重省十載游蹤嘆轉蓬

為雨為雲無定蹤半衾幽恨數聲鐘絃於離緒同時斷
墨與啼痕一樣濃無復芳心含豈寇空將薄命委芙蓉
西隣只在高樓畔似隔天台路幾重

擬劉晨阮肇入天台效曹唐

歷盡千山與萬山白雲飛處見松關路從碧澗通仙竇
夢絕紅塵出世間花落洞中春寂寂日斜溪上水潺潺
哀呼四壁多猿鳥迷却來蹤不可還

劉阮洞中遇仙子

路入天台境寂寥空中吹送白雲謠桃花片片流丹壑
瑤草青青映翠翹五色烟霞迷鶴夢數聲環珮隔虹橋
人生莫道仙凡別攜手春風是此宵

仙子送劉阮出洞

雞犬聲中羽袖分桃花折贈寄殷勤愁來玉液誰同飲
別後瑤笙忍獨聞蹤跡但隨溪上水仙凡只隔洞前雲
從今萬劫仍干劫惆悵無緣再遇君

仙子洞中憶劉郎

佳期誰信此生休
夢斷巫山幾度秋
瑤草似憐人遠去
桃花仍逐水東流
紅塵夜月空留枕
紫府春風獨倚樓
只恐重來迷處所
洞門深鎖碧苔幽

劉阮再至天台不復見仙子

重到仙源路轉深
舊遊蹤跡已銷沉
千年山水自朝暮
四壁烟霞成古今
不見胡麻流別澗
獨聞幽鳥噪空林
早知一別無尋處
應悔當時出洞心

萼綠華將歸九疑留別許真人

縹緲雲輶駕彩霓
半天遙聽玉麟嘶
身歸紫府難為別
目斷紅塵不住啼
新啟離筵鋪鳳髓
重封真誥印龍泥
黃金條脫空留贈
九點青山望已迷

玉女杜蘭香下嫁張碩

黃金釵股紫金鈿
忽駕鸞車降碧烟
百尺虹橋天上路
萬條花燭世間緣
雲璈曲妙調龍琯
露液杯濃啟鳳筵
却笑裴郎仙分淺
一雙玉杵種多年

張碩重寄杜蘭香

渺渺靈蹤去不還空勞珍重碧雲鬟
人間無路通瑤闕夢裏何因見玉顏
蘭露半銷香冉冉花風初度珮珊珊
欲將一札傳青鳥知住蓬萊第幾山

織女寄牛郎

臨流幾度待金飈天帝無情恨鵲橋
玉宇微茫空隔水銀河清淺不通潮
心隨鳳駕思靈匹淚逐龍梭上錦綃
難得歡娛容易別年年腸斷可憐宵

甲午迎春

家家簫鼓響何頻
海國驚看物候新
自有東風吹綵勝
不愁微雨灑紅塵
土牛未送山中臘
寶馬先行歲裏春
三十三齡容易過
蹉跎又是隔年人

歲暮感懷

年來蹤跡嘆蹉跎
獨向衡門戀薜蘿
前路虛名青鬢少
先人遺業白雲多
匆匆短晷愁中盡
冉冉浮生夢裏過
時事淒涼應莫問
空山相對意如何

甲午元日

平明曙色亂春烟
獨對東風意惘然
落葉乍開堯砌上
椒花先獻佛燈前
忽聞爆竹迎新歲
媿飲屠蘇後少年
莫道清霜隨臘盡
只愁飛入鬢毛邊

贈鄧道鳴都閩

千騎如雲瘴海間
一天明月照刀環
營門晝靜笙歌沸
部曲秋高劍戟閒
樂奏金鐃新破敵
名標銅柱舊平蠻
玉關他日功成後
猶見將軍鬢未斑

送林貞發之漢陽兼寄陳仲敬明府

江干折柳正春初，閩楚相看萬里餘。
滿路愁雲過七澤，一天明月弔三閭。
帆飛漢水鶯聲早，書到衡陽鴈影疎。
為語神明河上宰，故人生活計已樵漁。

王相如文學千里來訪詩以贈別

少年名姓滿詞場，千里相尋問草堂。
博物每披周石鼓，摘文能賦魯靈光。
九龍夜吼門前水，疋馬秋歸嶺外霜。
收得秘書盈萬卷，王家事業本青箱。

送歐陽霖仲歸鄉

梁獄書成淚未乾，天涯流落畏途難。
杼投已信曾參語，袍贈誰憐范叔寒。
逆旅相逢愁咄咄，故鄉歸去路漫漫。
布衣正好彈長鋏，何必逢人變鵷冠。

送周公子還金谿

彭蠡西歸去棹長，東風江上送周郎。
數聲怨聽歌驪曲，三月惟齋養鶴糧。
寄遠柳應攀驛路，思親花每夢河陽。
家山況與豐城近，別後遙看劍氣光。

送徐半刺之官淮陽

東風吹送片帆輕
江北江南萬里程
隋柳似迎行客過
淮流難比使君清
尚懷太姥看山夢
新就鹽官煮海名
盤裏水日堪餉客
幾時重見故人情

甲午端陽即事

滿市貧民盡譟呼
誰家尊酒汎菖蒲
漢廷久已饑方朔
楚澤何人弔左徒
殘喘厭看長命縷
空囊安用辟兵符
愁來試上孤城望
幾處炊烟幾處無

將發芋江別惟起惟揚二弟

霜落烏啼半上潮江頭那忍解蘭橈
已悲去路關山遠况復歸期歲月遙
衰鬢依人愁冉冉荒年為客索蕭蕭
他時兩地同相憶記得離筵是此宵

飲胡元瑞蘿月軒

停棹來尋澌水陽半窗蘿月坐飛觴
堦前鶴跡留苔淺秋後蟬聲出樹涼
客路兼葭寒細雨他鄉堪杵度微霜
布帆東下江流急滿目西風別恨長

寄別幼孺次來韻

故國青山又遠違懷人空有夢魂飛猿當暮雨聲偏慘
鴈到秋風影尚稀一夜思鄉華髮變中年為客壯心微
竹林此日無多侶莫向山中厭布衣

寄贈屠長卿儀部

姓名曾註玉皇家吸盡遙天五色霞一點真陽封土釜
六時神水轉河車黃冠長日居蓬島紫氣中宵隔若耶
莫道相逢期太晚于今佳識有龍沙

一區長傍鑑湖邊，坐對三花九品蓮。
家散黃金惟塑佛，詩成白雪半游仙。
栖禪淨室雲堪臥，馭氣遙空電可鞭。
他日從君無別語，祇應同證大因緣。

題公朗寶函樓

危樓百尺梵王居，禪誦聲高晚磬初。
一榻秋雲松火冷，半窻殘月竹陰疎。
鷺峰花雨諸天外，猊座金身六代餘。
多少塵勞都遣盡，獨留詩癖未全除。

寄懷瀚公

逆旅裁書問道安故園明月幾迴看身閒對客題詩易
歲儉逢人乞米難風動空山孤錫響霜深禪榻衲衣寒
知師不作天涯夢長夜忘眠坐戒壇

松陵舟中

西風吹袂失炎蒸落日波光似鏡澄囊裏錢餘綠戒酒
途中舟緩為尋僧孤村近浦船為市古寺臨江塔有燈
一帶人烟何處所榜歌遙指是松陵

吳閶弔高季迪太史

吳門燈火正黃昏
讀罷遺編濕淚痕
五字幾人傳故業
一杯何處弔吟魂
秋風茂苑留荒草
暮雨寒山泣斷猿
欲向居人問封土
衣冠未必葬家園

旅次石頭岸

石頭城下水微茫
回首鄉關驛路長
瓜步烟波連斷靄
秦淮雲樹隔斜陽
秋高落木迷村舍
夜靜寒潮到女牆
客裏愁心已如此
一聞南雁更淒涼

金陵懷古

白門京闕舊山川
朱雀烏衣夕照邊
百代荒陵崩夜雨
六朝遺殿鎖秋烟
胭脂歲久銷宮井
苔蘚春深繡御筵
往事淒涼無限淚
傷心最是建文年

客中感秋呈王德載盧子明柳陳甫諸公

他鄉為客長離憂
一夜新寒感敝裘
對酒正當桑落後
思家偏向雁來秋
白門月冷碁初斷
淮水霜深葉自流
不是天涯有知己
萍踪那得久淹留

送張孺愿還四明為兒娶婦

離情黯淡白門西何處雲山是會稽作客暫辭桃葉渡
思鄉多夢若耶溪寒蘆夜雨鴻初斷衰柳殘陽馬倦嘶
待汝尚平婚嫁畢五湖明月共招携

送胡彭舉之衡陽

愁折衰楊過御堤吳門遙望楚雲低高峰見月秋迴鴈
野店逢霜曉聽雞九派江流湓浦外一天帆影洞庭西
知君作客年來慣不畏猿聲日夜啼

葛震父招遊雨花臺同張康侯姚佩卿諸子

高臺千尺俯烟霞却望當年舊帝家
百雉都城仍踞虎六朝宮樹半栖鴉
雲邊淮水連天遠林際鍾山帶郭斜
獨有空門不銷歇至今猶落講壇花

送陸纂父山人還洞庭別業

他鄉相見又離羣滿目西風落葉聞
二水空洲孤棹遠三吳秋色一江分
白衣出郭金陵雨綠酒看山震澤雲
從此游蹤各南北月明無處不思君

同吳翁晉姚叔乂諸子集陳公衡衙齋

南朝仙吏擅風流四海論文半散裘
粉署烏啼花外雨白門鴉散柳邊秋
故宮雲氣銷長樂近郭湖光起莫愁
馬踏夜分歸路晚踈鐘遙動景陽樓

贈李茂承太學

雲間才子氣翩翩偶爾相逢入洛年
半夜孤帆三泖月一秋雙屐六朝烟
匣中紫氣頻看劍筆底青山不賣錢
同是天涯流落客何妨長醉酒壚邊

隔簾美人

環珮聲聞見不真多情綽約往來身只緣竹緯垂千縷
似對菱花隔一塵繡帶暗飄紋外影秋波潛送隙中春
重重錦浪生羅襪彷彿雲間遇洛神

同梅李豹林叔度碧峯寺訪如愚上人

行盡空林到沃洲滿林黃葉上方秋松遮古殿半山翠
竹隱空房三徑幽寶蓋影飄依佛座曇花香散拂經樓
年來綺語方除障不敢題詩贈惠休

同閔壽卿王獻子二山人集王德載都護溪閣

同得蕭字

尊酒憑虛破寂寥
秣陵雲物晚蕭蕭
窻開遠岫常邀月
閣枕寒溪共聽潮
萬里風烟天外盡
滿林秋色雁邊遙
主人久傍牆東隱
不向西山更射鵰

馬姬館贈梅子馬

寶劍逢人脫贈輕
平生肝膽片言傾
千秋白社工文客
半世青樓薄倖名
枕上楊花今日淚
渡頭桃葉舊時情
囊中不管黃金盡
猶買嬌歌夜夜聲

壽雪浪禪師九月九日五十初度

祇林遙見白毫光
髮祝多年尚未蒼
菩薩應期生下土
聖人此日出西方
堦前記臘松長在
座上拈花菊正香
一自九龍仍吐水
從今浴佛說重陽

金陵故宮

先朝遺殿閉塵埃
零落空勞過客哀
五夜銅壺乾罷滴
六宮金鎖澁難開
翠華去後全無影
羅綺焚餘尚有灰
弓劍盡埋烟雨冷
椒房一半上蒼苔

重陽後顧世卿招游清涼寺翠微亭

虛亭高與翠微連尚有黃花照法筵
下界梵音中夜磬半空帆影隔江船
馬行十里松陰月人藉孤峰草色烟
我本倦游多感慨老僧休說六朝年

陳彥莊侍御招遊清涼寺

同向空門結白蓮琳宮遙隱帝城邊
閉關僧是他方衲題壁人多異代賢
江北江南千里月山前山後萬家烟
座間自有霜威肅避暑何須說往年

送何伯達太學還鯉湖

歲晚扁舟發水濱，勞勞亭下歎離羣。
一行鴈影斜陽見，幾處砧聲半夜聞。
作客厭看吳苑月，思親翻望秣陵雲。
他時九滌勞魂夢，跨鯉仙人正是君。

燕子磯

蘆荻蕭蕭遠水平，沉江鐵鎖尚留名。
半空鶴鶴飛來影，千載龜鼉化去精。
石占中流危截浪，雲侵殘壘暝吞城。
山僧似惜游人別，猶送疎林磬一聲。

觀浦口珠泉

一泓如練淨無塵
幻出明珠顆顆新
疑是鮫宮逢賈客
難於金谷換佳人
夜光不說昆明水
照乘何須合浦濱
生滅由來歸泡沫
欲將靈跡問波神

訪梅禹金秦淮客舍

舟過長干問客星
風流不用嘆飄零
一秋桃葉居淮水
十月梅花夢敬亭
遊徧南朝多寶寺
繡殘西竺幾函經
贈君欲折藏鴉柳
滿目隋堤何處青

謝司理招遊道場山

碧樹香臺一徑紆，滿林幽鳥避前驅。
重重翠巘看蒼弁，渺渺層波見太湖。
鐘送餘聲過下界，雲留殘影挂浮屠。
畫船載月歸來晚，十里烟光澹欲無。

謁孫山人太初墓兼懷鄭吏部繼之

道場山下見荒阡，欲弔吟魂一愴然。
寂寂梨花寒食雨，蕭蕭蒿草夕陽烟。
空林夜靜聞猿嘯，斷碣年深借鹿眠。
若把梅亭比蒼水，千秋黃土總堪憐。

閨情

深閨長日望刀環
錦被香銷繡幙閒
豈有夢魂通暮峽
更無眉黛畫春山
情牽夜月孤蛩泣
目斷秋風一鴈還
不是狂夫恩意淺
由來薄命怨朱顏

同強善長包蒙吉計仲嘉徐子晉斯學上人集
寶林寺鏡公房時蒙吉來自東甌仲嘉歸自
燕趙

吳市飄零感歲華
偶携瓢笠到僧家
孤雲靜結人天果

朔氣寒生佛座花作客畏聞燕地雪逢君先問赤城霞
山中欲別各留偈送過虎溪將日斜

為王百谷悼亡

不顧房帷十載恩竊將靈藥月中奔楚臺有枕難通夢
漢殿無香可返魂夜靜鴛鴦虛錦帳書長鸚鵡喚瑤軒
小星三五沉何處垂老青衫濕淚痕

虎邱寺

千頃寒雲隱上方半天明月照迴廊玉鳬化去山精滅

金虎銷殘寶氣荒塔影虛空藏舍利泉聲日夜淬干將
霸圖零落浮圖在不拜吳王拜法王

贈彭城蘇姬

蘇小門前繫紫騮隔簾相見尚含羞青蛾暫結花間約
綠蟻能忘客裏愁一片輕寒銷枕簟半窻明月上瑩篴
從今若過彭城路不說張家燕子樓

初春德州道中有懷故園

落日平原朔氣凝征途迢遞倦難勝風生沙捲殘年雪

春至河銷半渡冰
古戍黃昏喧斷角
遠村寒夜見孤燈
鶯花自愛家林好
裘馬何心向五陵

易水懷古

一笑秦庭事已空
蕭蕭寒氣動悲風
飛霜枉購千金匕
貫日猶懸百丈虹
公子歌殘夜變白
田光死去血流紅
薊門零落咸陽火
易水年年只向東

同許靈長太學張去華山人陳幼孺曹能始二
孝廉集鄧汝高計部署中賦得長安新柳送

張成叔太學還四明

東風二月薊門過
新柳青青拂御河
淺綠乍分眉上黛
柔條難任笛中歌
幾時葉滿章臺路
有日花飛太液波
同是一枝堤畔種
無如此地別離多

下第後書懷

自是揚雲白
未玄不才那敢怨
蒼天回看故國八千里
誤戴儒冠十七年
貧倚詩書元失計
窮知文字信無權
雄心銷盡囊如水流
落依人面可憐

一領青衫萬斛塵溝隍十口計全貧關河偏阻空囊客
童僕潛歸得意人雲路豈能容野性帝鄉元不住閒身
長安浪說春光好未見丘園非是春

南還留別許靈長張叔弢馮咸甫鄧泰素文夢

珠柯起之諸子

日落燕關馬去遲一尊相對總相悲豈堪客路銷魂處
正值皇都失意時此去惡分燈下影重來愁益鬢邊絲
與君俱是飄零者空說加餐贈別離

謁孔林

洙泗潏迴兩派分
泰山龍護素王墳
傳經已化三千士
執贄難逢七十君
室築空塲生蔓草
樹殘荒隴起寒雲
一抔馬鬣勤瞻拜
欲向春風薦魯芹

燕子樓

舊日懽情委逝波
空樓燈影恨如何
一天夜月閒簫管
十載春風罷綺羅
松栢鎖烟愁思苦
牡丹含雨淚痕多
香銷粉歇歌塵散
忍見雙雙燕子過

書懷

歲月蹉跎黯自驚此身雖在鬢毛更江湖故舊無消息
童稚交遊半死生喜信空門綠漸老厭聞往事為多情
客中最是愁人處獨夜殘燈風雨聲

聞人仲璣卜居西湖詩以寄之

卜築南屏第幾峰烟霞長日伴遊蹤橋頭柳色湖心月
郭外潮聲寺裏鐘數載宦情同失馬千秋絕技羨雕龍
蘭橈竹杖頻來往十里荷花九里松

女冠還俗

愁戴黃冠老此身
芳心難禁黛眉顰
且拋王母當年約
去了蕭郎宿世因
斗帳自今開甲乙
星壇誰復守庚申
幾回却笑巫山女
雲雨空為夢裏人

戲嘲鄭四效長慶體

落落江湖無定跡
匆匆相見闔廬城
離鄉已是五六載
道舊曾無三兩聲
杯水覆堂難再返
浮雲出岫便無情
故人浪說工詞賦
只恐登樓賦未成

登延平玄妙觀

玄都俯瞰碧溪濱上帝高居接五雲
入院經聲朝斗拜繞壇香氣降真焚
龍精護法豐城劍烏篆書符玉洞文
月滿松關天籟寂飄飄笙鶴半空聞

登芝山善見塔

百轉清溪繞梵宮千尋丹磴勢盤空
曇花亂散諸天雨橋板斜飛一線虹
塔影層層青嶂外鐘聲隱隱白雲中
憑闌不敢輕呼吸帝座溟濛近可通

謁馬仙姬廟

元君仙籍出扶風廟食千年建水東
滿院松杉巢鶴鶴四時香火卜羆熊
青天紫氣生靈幄白日紅雲護寢宮
幾度憑虛朝上帝手拋霞帔幻成虹

初至武夷

道緣為重世緣輕總屬閒遊豈計程
九曲仙班邀鶴馭半空天樂奏鸞笙
經旬絕粒拋煙火到處行歌變姓名
多少函中遺蛻在不知若箇是前生

萬年宮

萬年宮殿魏王居
瑤草琪花滿玉除
壇下餘腥猶漢代
岩頭遺蛻是秦初
客從雲水求丹訣
帝遣風雷護簡書
我亦曾孫今再世
夢中親御紫鸞車

宿冲祐觀

風燈零落夜鐘殘
數卷玄經掩不看
藥採刀圭還玉液
火留文武養金丹
瑤池月滿鸞笙杳
石榻雲深蝶夢寒
斷盡世緣須及早
肯將白髮戴黃冠

宿接筍峰道院

絕壁懸厓入杳冥丹房長借白雲局地分六曲成三島
臺聳千層禮七星暮靄晴飛岩瀑翠秋烟寒隱石燈青
一聲獨鶴醒殘夢臥聽黃庭半部經

宿雲窩贈陳司馬

清溪九曲即蓬壺何用遙尋五嶽圖幽壑半開新淨室
秘書還看舊陰符鷓鴣班裏多年別雞犬雲中幾日驅
重住雲窩綠不偶前身或恐是丹樞

天游觀

高臺獨上翠千重吹散嵐烟有鐵龍地種三花元漢時
門扃五粒是秦封雲邊螺髻層層結雨後蛾眉點點濃
倚徧危闌遙極目九環衣帶束芙蓉

宿鼓子峰道院

芒鞋歷徧翠微巔脩竹陰中別有天洞隱黃冠皆淨侶
巖封白骨盡飛僊石當隙處精廬構路到窮時棧道懸
夜靜焚香同禮拜步虛聲散一爐烟

游水簾洞時久不雨飛沫稍微賦得一首

素練冰綃一夜收潺湲何處見龍湫
鮫人海底餘殘淚
玉女峰前上半鉤
自有玄珠藏赤水
不須瓊液咽重樓
一瓢欲挽銀河瀉
倒挂青天作瀑流

尋和叔道士不遇

暫去朝元出翠微
紅塵何處染綃衣
鸞傳紫府書頻至
鶴帶青城箭未歸
六甲風雷壇下守
半空日月鼎中飛
石函留得龍沙識
莫道蓬壺會面稀

武夷溪口送惟起弟度關

竹杖芒鞋歷翠峯，
崩縑忽動遠遊心。
離魂已與千峰斷，
別恨空如九曲深。
祇有飄蓬懷白璧，
全無大藥化黃金。
山中散盡賓雲曲，
淚落西風半夜砧。

青山遊侶散紛紛，
況復臨岐遠送君。
兩地鴈鴻難顧影，
一時鸞鶴總離羣。
人從杜若洲邊去，
路在桃花洞口分。
明發登高各惆悵，
鵝湖斜日幔亭雲。

武夷送吳元瀚還莆

日日看山住翠微
虹橋宴罷各將歸
幾時再買重遊櫂
三載方還舊釣磯
囊橐只携丹訣去
夢魂猶帶白雲飛
別君不用綈袍贈
玉女新裁五色衣

再送元瀚次來韻

一尊同向蓼花灘
露下丹楓落葉殘
身泛孤舟愁弟遠
淚揮雙袖別君難
淒涼戍角秋霜曉
明滅漁燈夜雨寒
此去入林尋舊隱
高齋新長幾琅玕

陳惟秦為其先人營墓久居永南山寄訊

春事飄零倍憶君滿庭紅雨落紛紛鰲峰已作三秋別
馬鬣新成四尺墳花下幾迴虛朗月竹中長日賦停雲
北邙正有松楸感烏鳥聲聲不可聞

訪薛煉師思齊

桃花千樹繞江干花裏幽居日考槃曲徑開時供鹿臥
方書抄就借人看一春草綠蓬門靜半夜雲生藥杵寒
聞說延年有真訣相逢先乞九還丹

壽李司理

曾將詞賦冠明廷
斷獄年來動引經
德比于公高漢室
名同小陸起華亭
壽筵猶獻長生縷
海國爭看執法星
何必西巖采三秀
郡齋瑤草自青青

鶴吹飄飄下九天
共看良更是神仙
朝來拄笏心如水
夏至懸弧日似年
函谷他時生紫氣
長庚此夜應青蓮
遙知臥理還多暇
注得叅同有幾篇

送王懋宣先生之泰順

垂楊影裏亂啼鶯
朝發都亭一騎輕
黯淡蘼蕪尋去路

微茫烟樹見孤城他鄉春色悲花落旅館愁心寄月明
白髮蕭蕭猶作客臨歧分手更關情

宿鄧汝高竹林山莊

羣峰迴合樹蒼蒼一徑雲陰散夏涼荒坂牛羊歸暮靄
比鄰鵝鴨睡斜陽竹當踈檻常流翠花落清溪不斷香
晏坐山中屏塵慮今宵如宿輞川莊

春日居法雲蘭若

移來書舍傍琳宮隔斷紅塵路不通游屐半閒新雨後

法幢高挂亂雲中夜深松偃疎簾月春盡花飛晚磬風
謾謂空門人跡少相尋日日有支公

登臨正及看花期青草歲縫步屨宜雨翳鯨音過院冷
風傳鶯語出林遲閒尋緇錫談三昧偶伴黃冠禮六時
自是山中堪避俗更無踪跡世人知

古路蒼蒼入鷺峰烟霞隔斷往來蹤時將真訣燈前課
每與遊僧竹下逢滿架瑤函藏貝葉遠林山色絢芙蓉
閉門晏坐塵緣息又聽雲堂起暮鐘

滿徑蒼苔過客稀
疎鐘纔動暝烟飛
輕敲竹院殘僧返
亂落松花一鶴歸
夜靜石燈分佛火
春寒山罽借禪衣
上方萬籟聞俱寂
但有經聲出翠微

送王少文藁葬西郊

蕭蕭孤櫬出郊關
執紼空餘涕潸潸
滿目松楸西郭路
半天風雨北邙山
函中白骨孤雲裏
世上紅塵一夢間
除却千年華表鶴
更於何處望君還

秋夜汝高振狂伯孺過宿山齋時汝高將赴闕

西風搖落正秋天相對空山意惻然竹裏孤燈消永夜
鏡中華髮感流年寒蛩古砌啼涼月小犬疎林吠暝烟
只恐心期隔霄漢豈能長向白雲眠

擬積雨輞川莊

經旬梅雨自沉沉灌木蕭森起夕陰泉過斷橋歸別澗
鐘傳古寺出空林閉門習靜山中樂晏坐焚香物外心
終日更無車馬客時從花塢聽鳴禽

擬長沙過賈誼宅

卷八
憐君謫宦楚江來，門外湘波日夜迴。
廢井年深生亂草，古牆春盡長荒苔。
猿聲似訴孤臣恨，馬首空勞過客哀。
此地無須嘆寥落，長安甲第亦成灰。

他鄉遷客恨悠悠，此日長沙宅尚留。
寂莫空梁栖鳥雀，蕭條古院閉松楸。
幾年宦況同雲薄，一去君恩共水流。
欲採江離傷往事，半天風雨洞庭秋。

無題

數聲殘漏滿簾霜，青鳥銜箋事渺茫。
剖贈半規蒼玉玦，

分將百合紫羅囊空傳垂手尊前舞新結愁眉鏡裏粧
一枕游仙終是夢桃花春色誤劉郎

無緣翻悔意相關雲雨巫陽一夢間獨撫朱弦哽咽
背流紅淚燭潺湲新分半玦終難合舊贈明珠未忍還
縱使章臺零落後長條猶自望君攀

錦衾羅帳淚潸然淡月微霜夜可憐
嚙臂尚思當日約同心空結片時緣
瓶沉古井渾身碎珠孕靈淵幾箇圓
一別天台成隔世桃花流水自年年

一寸湘筠淚滿枝百年幽恨是幽期朱絃忽斷驚難續
錦字私傳鳥不知新唾花痕沾廣袖舊分香氣散重帷
此生欲了尋春約須及清陰未綠時

劍化雌雄玉匣空寒潮東逝信誰通金生蓮步雙纏白
釧約冰肌一線紅事去懽娛并作怨緣乖魂夢也難同
芳菲零亂春光晚滿地臙脂半夜風

蘭心迷蝶柳藏鴉綺閣銀燈照九華百尺藍橋通步障
幾重巫峽隔窻紗魂銷翠帶胸前草腸斷青銅影裏花

落盡深紅春色晚
肯容劉阮更思家

鏡中雙鬢綰如鴉
廣袖新看染石華
曉起靚妝消翠靨
晝眠香汗浸紅紗
半溝膩水堪流葉
一尺雕欄不障花
總為多情眉黛蹙
怪他人說是西家

愁見流蘇百結同
繡幃寒夜一邊空
幾痕斑淚孤生竹
十指朱絲半死桐
在野鴛鴦虛枕被
出山鸚鵡怨樊籠
臂紗不解纏綿意
長護嫣紅舊守宮

歸期無定數
難占鳳蠟燒殘夜
未厭幾點金徽挑
後譜

半邊銅鏡嫁時奩紅銷榴帶絲空結朱褪櫻唇酒不沾
夢醒碧紗窗外月梅花踈影滿雕簷

玉殞珠沉思悄然明中流淚暗相憐常圖蛺蝶花樓下
記刺鴛鴦繡幙前祇有夢魂能結雨曾無心膽似非煙
朱顏皓齒歸黃土脉脉空尋再世緣

烈女吟

湘水難同此恨深幽閨長詠栢舟吟半生夜雨常悲鶴
六禮春風未委禽瑟斷朱絃因廢軫燭銷紅淚見灰心

寢門一訣十年怨魂夢無由識藁砧

秋日陳汝大鄧汝高陳振狂陳子卿陳幼孺袁
無競興公弟集綠玉齋時余與子卿幼孺下
第歸自長安汝高將使浙中興公將游白下
竹林文酒暫盤桓聚散無期後會難燈下幾人分去住
尊前雙淚帶悲歡傷心此別魂俱斷落魄初歸夢未安
他日東行占太史客星遙傍使星看

送林觀察備兵金衢

使節翩翩浙水過東山那許久蹉跎一門劍履閩中少
百將橐鞬越絕多露布星馳官負弩霜臺月滿士橫戈
九重正爾資籌算無暇尋仙訪爛柯

贈車子仁郡侯

含來鷄舌尚氤氲新握麟符到海濱案了簿書心似水
門投詞賦客如雲市中騎竹迎童子池上揮鞭醉使君
敝刺即今羞自獻敢言名姓舊相聞

寄譚忠卿比部

清時才子賦懷沙抗疏歸來髮未華
粉署一官淹組綬
青衫雙淚怨琵琶
杼投慈母綠憂國環賜明君定起家
却愛衡門當庾嶺相思不用寄梅花

送陳永奉游金陵

千里行裝半醪醕
渡江君去莫教醒
馬經小小佳人墓
舟過勞勞送客亭
揚子風高潮自白
隋堤秋盡柳無青
後庭遺曲桓伊笛
都向秦淮月下聽

壽大司馬吳公

金文公集卷八
班綴鵷鸞爵上公鼎烹龍虎貌還童鐵冠曾執三湘憲
銅柱猶存五嶺功曳處履聲為赤舄懸來弧影是彤弓
渭濱未許長垂釣聞說君王正夢熊

進賢冠換七皇冠篋裏陰符不再看上帝久頒書玉檢
先皇曾賜露金盤白蒙頭上應還黑赤在中心已是丹
借得方平壺十二更於今夕獻瑤壇

送薛君大秀才遊武林

司馬南游正少年可堪人去雁來前孤舟白擁蘆藏月

兩岸青殘柳散煙帆外客星灘七里湖中佛日竺三天
射潮不用錢王弩但有觀濤賦幾篇

送鄧汝高戶曹督餉之浙

粉署含香又幾年轉輸今識鄭侯賢還家樹不言溫室
行部山應訪冷泉玉塵夜揮天竺月畫船秋放太湖烟
江南水旱憂非細願悉民艱疏御前

送孫四之金陵

一時詞客嘆飄蓬無數離尊半日同買笑好留錢子母

防身須仗劍雌雄鹿麋夜走三吳苑狐兔秋悲六代宮
建業城邊堪飲水孫郎名自起江東


古田極樂寺曉起

聽盡蓮華刻漏長山深嵐翠滿繩牀鳥啼松嶂聲聲月
僧踏楓林步步霜座上落花天外雨佛前沈水定中香
此生總是空門客到處皈依有法王

過鄭樵林山人市隱堂

一丘高卧久忘機雙屐行歌徧翠微綸挂夕陽春釣罷

笠携殘雪晚樵歸松窗月冷烟霞夢菊徑雲生薜荔衣
不用鑿坏深避世山城車馬往來稀



幔亭集卷八

欽定四庫全書

集部

幔亭集卷九

十

詳校官中書

臣徐志晉

侍讀臣孫球覆勘

總校官庶吉士

臣倉聖脉

校對官中書

臣戴衢亨

謄錄監生

臣姜今熙

欽定四庫全書

幔亭集卷九

明 徐燾 撰

七言律詩

丙申元日得惟起弟越中書聞王玉生客茗消
息因柬錢叔達

清尊何意醉流霞
覽鏡空驚鬢易華
堦下莫開新歲葉
隴頭梅寄隔年花
人逢老去常懷舊
客到春來定憶家

此日交遊多失路豈君蹤跡獨天涯

送翁兆震太史冊封周藩事竣還朝

暫綴鸛班馬首東桃花色借錦袍紅鞭揮上苑三眠柳
圭捧深宮半葉桐飛蓋兔園歌夜雪鳴珂燕市動春風
漢家金匱資良史好奏諸儒白虎通

送張宗道之金陵兼懷諸舊游

茫茫烟水片帆輕學得陶朱變姓名芳草樓臺歌子夜
梨花村店過清明莫愁湖送當年槩瓜步江流六代聲

欲作封題還自懶知君今去石頭城

屠田叔使君枉過兼惠藏書賦謝

藝苑相聞十載餘應知名下定無虛不拘世路尋常禮
還贈人間未有書草澤敢當高士榻蓬門終礙使君車
自慚巴曲非同調空枉干旄問索居

送陳汝翔客建溪書林

垂老江湖作校書春風長日掩衡廬經收壞壁驅殘蠹
字出名山辨魯魚著述未忘玄晏癖往來多是鄴侯居

不須二酉藏遺草九曲僊都當石渠

寄題郭張虛香雪齋

高齋遙散白氤氲歷亂梅花到處聞一笛殘魂千樹雪
半窻疎影滿林雲寒生姑射仙人夢香借孤山處士墳
何物江南堪寄遠年年春色倍思君

鄭邦衡以書見貽兼惠玉章詩扇賦此荅贈

相憐不必舊相歡忽枉裁書問考槃投贈一雙皆楚璧
留題五字有齊紈琴尊幾日同花竹魂夢中宵到木蘭

年少聲名君籍甚淺才何敢作衙官

花朝社集送余宗漢明府之南康訪楊使君

滿路流鶯送客輶匡廬山色望中遙
朱門何處堪餬口
白髮逢人反折腰
月下歌聲虛竹徑
天涯離恨記花朝
知君此去經彭澤
陶令高風未寂寥

送了空禪師歸長干寺是日為觀音大士初度
尋聲疑自普陀來
又贈楊枝海上回
緇衲折蘆初地去
白衣成果普門開
數千里路看飛錫
五十三叅送善財

他日懷師勞遠夢棲霞蘭若雨花臺

分得要離塚送陳伯孺之姑蘇

漆燈明滅半無光
斷碣凋殘字幾行
黃土一抔封馬鬣
紫苔三寸鏹魚腸
月中似聽英魂泣
地下難埋俠骨香
況與伯鸞丘壠近
煩君并為薦椒漿

再送陳伯孺兼東在杭

尊前酒盡即他鄉
豈為分携始斷腸
失路客身輕似葉
倚門親鬢白於霜
歸裝不望中人產
內顧先營百日糧

未必綈袍能解贈臨行還囑寄衣裳

天涯休用歎窮愁得稱閒心是浪游湖上翠蛾三竺寺
月中青雀百花洲囊無重載身何累交有深知刺易投
貧賤依人君莫愧布衣誰不謁諸侯

送陳振狂游玉華

酒酣璫液唱游仙萬樹桃花引去船路遠潺湲千澗水
巖開混沌五更天雲根白積峰頭雪松火青飛洞裡烟
采藥倘逢秦代客莫言人世是何年

懷吳元瀚

總是飄零未定身不知吳楚與燕秦
遠天夜雨孤舟冷
古道秋風一劍貧
到處南冠羞對客
誰家西第肯留賓
薄游只恐無歸計
跡落江湖又幾春

贈薛君佐秀才

年少詞華舊有聲
高標應比玉壺清
一春草向池中夢
五色花從筆裡生
座滿烟霞揮麈尾
匣騰風雨泣龍精
青雲自是君家業
傲世休耽白社名

寒食日陳汝大園亭看海棠

寒食東風到舞筵
海棠開遍艷陽天
銀罌杏酪香同飽
畫架榴裙血並鮮
帶雨花神嬌欲泣
怯寒妃子醉無眠
夜深莫更移燈看
今日山厨未有煙

春日同叔達汝大惟秦幼孺粹夫能始興公集
無競南郊水亭

布穀聲中醉倚欄
夕陽山色隔簾看
青團柳葉春烟薄
白散梨花暮雨寒
燕壘泥香芳徑晚
魚梁痕淺小池乾

只因地僻稀來往門外低枝欲礙冠

病中試鼓山寺僧所惠新茶

偃卧山窻日正長老僧分贈茗盈筐燒殘楮拙偏多味
沸出松濤更覺香火候已周開鼎器病魔初伏有旗槍
隔林况聽鶯聲好移向茶蘼架下嘗

鍾山寺訪張孺愿畱酌話舊

客中尊酒暫淹留共對禪燈憶舊遊此日聽鶯蕭寺雨
當年騎馬秣陵秋風塵未肯容衰鬢歲月何堪老敝裘

獨有劔鋒銷不盡君家神物是吳鉤

邀黃仲高張孺愿錢叔達張公魯陳汝大陳汝

翔陳惟秦王玉生陳幼孺王粹夫顏廷愉曹

能始興公弟雨中集萬歲寺即席送徐仲和

歸錢唐

共酌醞酬送客還晚風吹雨暗禪關綠波春草長途別
白社蓮花半日閒家望雷峰烟外塔夢迴天竺月中山
淨瓶分得楊枝贈垂柳臨歧不用攀

送黃仲高之漳州

送君南去瘴雲邊遙望征途路一千五月楓亭扶荔雨
幾村茅店刺桐烟土音未辨難聞曲海錯常供不費錢
少婦當壚堪買醉時時停策酒家眠

送曹二進士之金谿弔周明府

千里分襟悵別離西州雙淚數年悲途中磨鏡同徐穉
匣裡亡琴痛子期楚璞謾云增價早隋珠猶悔報恩遲
九原未必無遺恨不見看花上苑時

賦得廣陵濤送客之維揚

萬馬聲喧不暫停
滿天風浪晝冥冥
遙連鐵甕千層白
微露金焦兩點青
吳楚山河分一水
齊梁烟月付中泠
傷心莫作蕪城賦
好辨江干瘞鶴銘

同屠田叔張孺愿錢叔達張公魯及社中諸子
集陳正夫水亭分得文字

習池花木翠氤氲
忽枉高軒過使君
囊裡詩籤拈五字
尊前樂府演雙文
杯傾竹葉春頻醉
燭燼蘭膏夜已分

地主獨留髧送客猶餘絲管夢中聞

不寐感懷

杜宇啼殘漏正長
滿林斜月到匡牀
浮生寤寐皆成夢
舊事悲歡總可傷
知己未亡琴廢軫
雄心猶在劍銷芒
枕前二十餘年淚
半在他鄉半故鄉

聞伯孺由吳興入姑蘇遙有此寄

一劍飄零渡五湖
半年蹤跡徧三吳
苕溪日暮愁心遠
笠澤天長客夢孤
舊隱雲深寒薜荔
他鄉春盡變蘼蕪

滿船載得烏程酒曾酌要離墓上無

再懷伯孺

登樓一望意淒淒目極遙空白練低
匹馬烟花吳苑曲孤舟風雨太湖西
愁中芳草迷三徑別後垂楊暗六溪
千里懷人多感慨每看南鴈憶封題

東程子暉

求友空歌伐木聲逢君真見古人情
跡因避世青山近心為憂時白髮生
倚杖暮雲花徑遠捲簾春雨荔枝清

除將問道尋師外那得龐公肯入城

七夕鄧汝高民部招集玉皇閣同余宗漢謝脩
之明府鄧道鳴閩帥錢叔達王粹夫山人陳
汝大康元龍袁無競秀才陳幼孺孝廉興公
舍弟賦分得五歌

高閣開尊對薜蘿風吹零露下庭柯
三秋白帝司權早
一夕紅妝乞巧多
夜杼暫停機上錦涼衣初試篋中羅
少微歷歷干天象不獨雙星夜渡河

鄧道鳴閫帥招集隣霄臺送鄧汝高計部還朝
三疊驪歌遶翠微涼風初動葉初飛尊傾大將葡萄酒
淚濕窮交薜荔衣自信青山盟尚在空憐白社客全稀
清冷臺上頻回首目斷燕雲一鴈歸

八月十四日夜招張孺愿錢叔達謝脩之陳汝
大王玉生袁無競集平遠臺觀萬歲神光二
塔燈分得八庚

良夜高臺露氣清遙空靈籟送秋聲桂枝先自輪中滿

蓮炬還從鏡裡生
隱隱七層標
舍利雙雙百寶放光明
龍膏燭與蟾蜍影
同向人天照化城

送張孺愿還四明

津亭歌罷酒杯空
目極遙天送斷鴻
馬上夕陽孤店柳
渡頭殘月半林楓
瘴雲漠漠辭閩北
鄉樹重重辨甬東
此日蓴鱸歸計得
思家張翰怯秋風

送黃仲高還四明

江頭尊酒別離難
滿目疎林落葉丹
家望剡川湖一曲

車驅閩嶺路千盤
關門曉色雞聲早
曠野秋聲鴈影寒
今夜夢君何處所
半天殘月蓼花灘

寄鄧德咸明府

一代風流墨綬郎
幾年為政似庚桑
居官共號神明宰
判事多成急就章
灘送九龍來廨宇
庭畱雙鶴守琴牀
春光莫羨河陽暖
六月還飛白簡霜

送陳振狂之汀州

秋色將殘樹影稀
故人西去鴈南飛
滿林楓葉拼欄寺

兩岸蘆花鐵石磯，霜冷戍樓喧暮柝。
月明村舍搗寒衣，九龍溪上灘聲急。
千里羈魂一夜歸。

與吳元瀚話舊

久客還家嘆敝裘，對君猶自起離愁。
數莖白髮尊前淚，九曲青山夢裡遊。
松徑夕陽秋繫馬，竹房疎雨午啼鳩。
明朝又作匆匆別，目斷西風獨倚樓。

張叔麟別駕招集鍾山客舍席上聽伎共限冷
香二字

白苧歌殘欲斷腸相逢誰是有心郎
羅幃巫峽聲聲雨
玉杵藍橋夜夜霜
燭淚半灰金剪冷
花魂初散寶釵香
紅顏自昔多憔悴
豈學愁眉別樣粧

送鄧道鳴參戎東粵

樓船橫海發閩關
新擁高牙五嶺間
月滿柳營秋校獵
火飛藤峽夜征蠻
雙龍斬水妖精泣
萬馬嘶風部曲閒
名在羅浮峰四百
功成何用勒燕山

贈林敷毅公子

年少懸書向國門家聲猶說紫薇垣登壇久已推牛耳
授簡曾看擅兔園擁篲諸侯虛左席操觚詞客結中原
功名不用垂鐘鼎白首江湖亦主恩

送張參戎鎮秦川

鐵衣曾典羽林兵又握銅符海上行此日八蠻傳露布
同時諸將拜霓旌臂開鵠血弓流影腰泣龍魂劍有聲
見說轅門容揖客可能前筓借書生

送長樂令郁文叔謝病還晉陵

棄官應遂白雲心行李空携單父琴病骨豈堪長負弩
黑頭偏乞早投簪家當楊柳茶烟細門比柴桑柳色陰
除却簿書勞半載一生清福總山林

贈張太醫

年少曾將肘後探高名今已似蘇耽石烹夜月松烟細
藥洗春泉橋井甘函裡難經緒九九洞中爐火轉三三
功成他日生毛羽看駕雲車白鹿叅

題芳草王孫卷為羅生挽所知

聯壁當年舊有聲千秋埋玉怨難平邯鄲久作炊梁夢
都市猶傳擲果名腸斷山陽燈下笛魂銷緱嶺月中笙
萋萋滿目王孫草歲歲春風墓上生

丙申除夕

莫問殘冬歷一行且將生計寄絲簧燒燈客丐宜春帖
對鏡人凝綵勝妝衰鬢又添新歲感童心猶記少年場
擁爐坐聽蓮花漏待進山厨栢葉觴

丁酉元日

歲月悠悠獨自知
屠蘇飲較衆人遲
一年苦樂俱陳迹
昨日呻吟即舊詩
才盡敢云心似錦
顏衰猶幸鬢無絲
春風不厭衡門冷
吹徧繁花雪萬枝

送彭興祖游燕

都亭新柳折為鞭
又別閩南北向燕
馬首一星邊
地火鶯聲三月御
河烟吳儂枕上紅
樓曲趙女壚頭綠
酒錢此日離情君
莫忘落花風雨寺
門前

分得胭脂井送陳淳夫太學之金陵

胭脂零落井痕荒水面桃花照艷妝碧甃一泓沉寶珥
紅泉千點滴銀牀金函半染鉛華色絲綆猶牽珠翠香
莫問故宮生死地轆轤容易轉愁腸

送陳志玄還中都

一片離心雙淚垂人歸偏在送春時雞聲殘月郵亭火
馬首疎烟酒店旗江北瓊花孤館夢淮南叢桂故園思
東風吹徧無情柳滿路青青拂面絲

送黃君甫還劍津

故園歸去獨揚舲
躑躅花殘落遠汀
鸚武春銜杯裡月
蛟龍宵睨劍頭星
灘迴巨浪千層白
門對高峰九點青
莫道盈盈分一水
相思魂斷幾長亭

分得宮花一萬樹送曹能始進士赴闕

芳菲叢裡拜楓宸
鈴索聲中雨露新
香霧有時分太極
穠華隨處拂勾陳
重重綠染宮袍色
片片紅酣御輦塵
不似曲江騎馬日
杏林惟探一枝春

分得李子裘送錢叔達歸吳興

旅邸淹留歷幾春
黑貂無復到來新
蒙茸莫問千金腋
襁褓翻疑百結鶉
失路易沾函谷雨
還家猶染洛陽塵
布衣落魄慙妻嫂
應悔當年浪入秦

題黃伯寵秀才歐冶山房

疎松影裡草玄亭
屋後羣峰列翠屏
殘雨小塘萍散綠
微風幽徑竹搖青
觴尋曲水流三月
劍拔寒潭洗七星
寂寂衡門無客到
林鶯啼午夢初醒

夏日邀屠田叔使君余宗漢明府閔壽卿柳陳

父王獻子錢叔達吳元翰諸山人顏廷愉都
護興公舍弟避暑平遠堂分得一先韻

借得琳宮結淨緣
數聲鐘磬出諸天
龍江潮滿千溪合
雉堞雲開萬井連
瀑布亂飛丹嶂雨
山衣同歷翠微烟
莫言座上無絲竹
花外啼鶯柳外蟬

壽車郡公

銅虎分來向海濱
玉皇香案記前身
採將瑤草三山秀
種得甘棠一郡春
天上紫鸞扶絳節
雲中白鹿駕朱輪

壽筵不用蟠桃薦丹荔冰盤色正新

題周朝宋轉運三代榮封冊

出宰河陽舊有聲司農今復借雙旌
轉輸歲向三邊急斥鹵烟從萬竈生
紫禁綵綸榮馬鬣熙朝冠蓋擅羊城
一門雨露皆君寵不獨雲霄兩弟兄

閩王審知墓下作

玉輦何年去不回霸圖千古總成灰
秋深兔穴依寒壠歲久魚燈暗夜臺
故國關河甌越在遺民蘋藻鼎湖哀

蓮花峰下黃昏月猶見三郎白馬來

送林志尹謁選之京時予將入燕

數聲南鴈叫秋烟路指交河北到天雞送邊城霜後角
馬驚沙磧雪中鞭貧來遠道親雄劍老去長安索俸錢
我已藏名燕市久相尋休向酒壚前

送閔壽卿從武夷還金山兼隱華陽洞

歷徧清溪九曲深麻衣隨意住雲林陰符一卷蛟龍護
秋笛數聲猿鶴吟玉洞烟霞通地肺金山臺殿影波心

空懷五嶽平生志未得從君學向禽

送陳憲伯入覲便道歸省

萬國諸侯會建章使君千騎出東方繡衣正奏三年績
綵服還稱百歲觴轡攬朱輪宵擁月疏封白簡晝飛霜
法星漸與閩天遠遙望精光帝座傍

送閔孝昭侍尊人還廣陵

暫得相逢又解携灘聲高下槳聲齊東裝欲跨揚州鶴
問寢頻聽旅店雞夜月故園淮浦北秋雲鄉路海門西

還期共醉蕪城酒繫馬隋宮舊柳堤

送溫永叔郡丞守南寧

符分銅虎寄專城新駕朱輪嶺表行
八桂瘴雲迎五馬
二江嵐月引雙旌禁將巫蠱蠻丁化
爍出靈犀颺母驚
地近交州風土別每逢春雨勸刀耕

送鄧德咸刺史官沔陽

楚江猿嘯豈堪聽野水連天過洞庭
夜月褰帷逢漢女
秋風行部弔湘靈九疑峰色參差碧
三峽雲光黯淡青

君去不愁難寄遠蕭蕭蘭芷滿寒汀

題黃懋中大學士碩寬堂

多年簪筆侍螭頭焚却銀魚早乞休十畝雲霞開徑日
半樓烟雨捲簾秋小山桂樹叢叢綠曲澗桃花片片流
不是能耽泉石趣幾人青鬢老菟裘

留別陳叔度

幾日相逢意未闌誰知相別不成懽尊前草色銷魂易
笛裡梅花寄遠難雞唱曉霜孤枕怯馬嘶殘雪一鞭寒

雖然千里同明月兩地傷心各自看

除夕前二日同康元龍集江參藩先生園亭

停驂歲晚向名園滿徑寒花映酒尊
雪色半侵青玉案星光多傍紫薇垣
幾年媿下高人榻一劍長銜國士恩
不是殘年催去客敢辭十日飲平原

武林驛別康元龍

錢唐江上浪層層此地分携感慨增
客路殘年悲短劍驛亭寒夜憶孤燈
歸魂黑度千林雨鄉淚紅凝半枕冰

江北江南天萬里不堪回首望西陵

語溪舟中除夕用舊韻

滿江燈火照帆檣
斷送韶華在異鄉
紅燭也流今夕淚
青銅猶憶去年妝
孤身長路思千里
半世虛名夢幾場
欲解離愁謀一醉
行厨何處有椒觴

除夕西寺訪朗公

停棹清溪值歲除
匆匆溪上訪僧居
殘年只聽蓮花漏
半偈猶繙貝葉書
爆竹聲喧人語沸
石燈光照佛堂虛

五噫悔作飄零客願得從師證六如

戊戌元日構李舟中

千里關河更問津東風吹動柳條新
雞聲不挽難留歲馬齒偏催易老身
樓上綺羅誰氏女帆前簫鼓異鄉人
客心久已如荼苦何用盤中薦五辛

曾人倩祕書招飲衙齋話舊分得昏字

悠悠往事不堪論燕市悲歌欲斷魂
折柳豈忘逢驛路頌椒還記醉祗園
千金索盡心猶壯一劍鋒銷俠尚存

酒後對君思起舞浮雲西北易黃昏

寄懷陳伯孺

六溪疎柳幾條斜不異柴桑處士家日午山窻書薤葉
春深江閣畫梅花鄰莊與弟同漁獵古寺尋僧共結跏
獨有故人傷遠別年年衰鬢客京華

紀事

漢家臺殿敞蓬萊玉柱盤龍接上台廿載皇仁深雨露
一時天意變風雷宮牆夜靜啼烏急苑樹春歸乳燕來

翹首五雲天萬里小臣雙淚泣秦灰

紛紛兵甲滿中原市井蕭條有幾村
總為瓊林傷地脉非貪寶氣鑿雲根
中涓數獻便宜策丁壯難招慟哭魂
辛苦西臺姚柱史畫圖空自叩天閭

王師一夜報蒼黃大將星沉晝不光
塞外忠魂酬玉劍沙中枯骨帶金瘡
黃昏燐火新亡卒白日烽烟古戰場
莫向居庸城上望霜天笳管總悲涼

櫓檣夜望射天弧邊計年來困輓輸
萬里君門誰伏闕

四郊皇店盡徵租虎賁宿將多凋謝
烏合新兵屢譟呼
時事艱危堪涕淚
太平能到白頭無

得王元直金陵書却寄

芳草天涯怨不勝
懷人魂夢苦無憑
何來一騎過淮水
傳得雙魚自秣陵
桃葉暖風春訪伎
杏花微雨夜尋僧
玉蟬精舍歲蕤鎖
寂寞疎林半點燈

贈王思延都護

年少登壇擁隼旂
欲將長劍掃穹廬
黃金世佩通侯印

彤管家藏太史書異域葡萄杯上綠邊城楊柳笛中疎
運籌自合陰符祕兵法無勞習穰苴

贈王君密民部

年少風流粉署郎賦成爭誦魯靈光閒曹不廢青箱業
先世猶傳白簡霜九折羊腸曾叱馭一官雞舌正含香
潞河公暇門如水花竹陰陰客滿堂

潞河逢梅子馬時子馬自楚使燕

當年同聽白門鴉別後風烟幾歲華萬里飄零逢潞水

一官牢落傍長沙
新愁綠岸帆前柳
舊事青樓夢裡花
草草離尊猶未醉
數聲殘角又天涯

天津道中懷王玉生

老向郊原受一廛
村中幽事總堪憐
園栽桑柘同韋曲
塢築辛夷學輞川
花下筆牀臨粉本
松間茶鼎扇青烟
自從南北風塵遠
不到東山又幾年

連窩舟中與張叔弢話舊

同泛歸舟下潞河
空將身世感蹉跎
十年京洛紅塵滿

三載朱崖白髮多雲暗戍樓喧斷角月殘官渡起悲歌
愁君此去王程急兩岸蘆花奈別何

淮陰舟夜寄懷二雲歌姬

淮浦東邊月影斜相思何處問琵琶別時折是章臺柳
夢裡歌為玉樹花萬里客魂銷綠鬢幾回幽恨寄紅牙
遙知香骨懷人瘦寬盡春風繫臂紗

廣陵七夕聞歌有懷

每看秋水憶臨波況值天孫夜渡河衣上餘香懷賈女

竹間殘淚怨湘娥書從薊北傳來少夢到江南別後多
二十四橋橋畔月不堪重聽繞梁歌

真州逢謝在杭司理

蕭蕭書劍傍風塵況對天涯骨肉親半夜斷猿知己淚
經年羸馬異鄉身飄零湖海愁歸客憔悴江潭問逐臣
此日世途君自見莫將青鬢嘆沉淪

舟次楓橋寄陳汝大先生

蕭蕭羸馬厭馳驅愁聽楓橋月落烏開徧芙蓉思故國

折來楊柳記西湖十年獻賦青雲薄千里題詩白社孤
我為飄零雙鬢短憶君霜雪滿頭顱

懷李儀卿

梅花綃帳曉寒生怨似流蘇百結成遠岫猶憐眉黛淺
凌波還憶襪羅輕倦來司馬偏多病老去徐娘更有情
十載舊歡真一夢釣龍臺上月空明

驛亭夜坐書懷寄內

十年書劍兩無成飄泊江湖媿姓名絡緯聲沉愁易集

芙蓉花老怨難平
枕邊暮雨離魂結
鏡裡秋霜客路生
共隱青山期白首
古來曾有鹿門耕

贈沈雅咸

愛君蓬葦綠蘿間
住近楓橋第幾灣
短屐一春游茂苑
疎鐘半夜聽寒山
門多詞客尋詩至
寺有高僧乞畫還
數頃烟波滿船月
歌聲來往水雲間

過沈從先江居

停棹來尋江上居
閉門知與世情疎
買魚入市兒沽酒

負米還家母倚閭
委巷幾留高士轍
寒窻長課小童書
空憐四壁蕭條甚
薄俗何人重子虛

垂虹夜泊懷陳幼孺

吳江殘露冷丹楓
萬里還家嘆轉蓬
世路升沉同塞馬
鄉書寥落怨邊鴻
舟移晚渡三更月
橋跨秋波百丈虹
猶憶當年分別處
征衣憔悴泣西風

姑蘇懷鄭翰卿

十年蹤跡遍天涯
散盡黃金滿狹斜
莊舄豈能忘越國

莫愁原自屬盧家
孤鶯白嶽啼衰柳
匹馬青樓過落花
日暮思君心獨遠
片帆江上阻蒹葭

送張叔弢令羅浮

瓊海曾乘博望槎
惠陽為政又携家
琴牀半落姑仙雪
印匣全封葛令砂
輸稅山農冠箬葉
趨墟蠻女賣梅花
官閒好作羅浮長
四百峰中早放衙

秋日訪徐茂吳司理

青鬢投簪二十年
菟裘高築虎林偏
胸吞雲夢全無楚

屋貯華陽小有天
楊柳影侵遊寺屐
竹枝歌送泛湖船
錢唐江上潮如馬
定賦觀濤第幾篇

西湖秋夜寄紫玉侍兒

他鄉流落怨歸期
天外秋風鴈去遲
枕上雨聲燈下淚
湖心山色鏡中眉
難將雙楫迎桃葉
愁聽孤舟唱竹枝
遙憶瑣窗腸斷處
殘更哀角夢迴時

錢唐感舊

吳山殘黛晚烟低
滿目桃花路又迷
夜夜淚痕悲角枕

年年幽恨閉香閨
分枝菡萏難連理
隔水鴛鴦暫並栖
司馬琴心今漸老
斷腸明月小樓西

七里灘懷惟秦

桐江風冷露華溥
舟過嚴陵七里灘
秋晚鴈聲楓外老
夜深漁火蓼邊殘
月明古渡波千頃
雲暗高峰路幾盤
遙憶故人滄海上
白頭猶自守綸竿

過武夷訪閔壽卿蘧廬一宿而別兼柬渾然道人江仲魚秀才

蘧廬高結傍巖巒翠壁千重路幾灣霞色全飛丹竈火
溪聲長遶白雲關風塵已作經年別烟水聊分一夜閒
唱罷金雞天欲曉漁郎蹤跡又人間

聞屠田叔轉運擢守辰州寄贈

新駕朱輪驛路賒甘棠初種郡庭花三苗納款沅陵地
五馬行春楚水涯酉室名山探綠字辰溪深洞覓丹砂
桃川正屬提封內試問秦人尚幾家

送陳汝翔遊惠州

馬蹄隨處認桃榔千里孤身入瘴鄉
嶺路春聲啼翡翠蠻村秋色變蕉黃
朝雲香骨纍纍土夜月花神淡淡妝
莫向異方思故國夏初先得荔枝嘗

為屠田叔悼亡姬

渺渺凌波去絕蹤每看遺桂恨重重
魂同睡蝶招難返血比啼鵲拭更濃
黃土有情封玉骨青銅無計鑄花容
君行正近高唐路腸斷巫陽第幾峰

一別妝樓閉寢門梨花風雨泣黃昏
蚌枯滄海珠無淚

魚葬青山玉不溫
金谷尚傳三斛價
羅幃空負十年恩
春來忍看孤飛燕
恐是嬌姬戀主魂

自題小像

平生非俠亦非儒
半世游閒七尺軀
却為踈狂因偃蹇
未忘柔曼轉清癯
違時傲骨貧猶長
對客詩腸老漸枯
五字吟成心獨苦
不知身後得傳無

展卷徒為老大悲
形容將槁鬢將絲
有時憤世空饒舌
何處談詩不解頤
足為無車行路健
心因多累記書遲

自知瘦骨宜貧賤莫怨人間只相皮

寄懷李惟順贊府

巖邑蕭條早閉關翠屏高映訟庭間
官同潘縣栽花至客到龍門御李還
衙聽孤鶯聲共放吏兼雙鶴影俱閒
琴牀一曲停流水又對青娥畫遠山

林子真久客臨汀聞余歸自長安
貽書慰藉感而賦荅

經年離思杳難裁望斷江南雪後梅
錦字忽傳孤鴈至

明珠驚向九龍來雄心已耗劉蕡第死骨誰收郭隗臺
總為窮愁才易盡豈堪重問筆花開

送屠使君至芋江是夕留飲驛亭以梨園佐觴
使君首倡依韻奉荅

追憶三載別今朝對酒離魂黯欲消楚國行春迎露冕
郵亭卜夜駐星軺殘雞唱斷風生柝萬馬聲寒月送潮
暫歇梨園留刻燭莫教紅蠟一時燒

困關再別屠使君次來韻

使君才藻似枚臯立得詞壇赤幟高
薄俸半因開社費閒心多為著書勞
年來淮桂歌招隱此去湘蘭賦反騷
五馬驂驪人獨遠楚天遙望首空搔

萬里沅陵楚水隈一麾今出越王臺
當筵客盡留詩別卧轍人多掩淚回
津汎神龍悲劍去峰過迴鴈望書裁
九疑漸近三山遠何處登臨屐再陪

崇德令孫先生挽詩

語溪為政號神君黑髮俄脩地下文
遠道野僧歌薤露

寒宵山鬼哭松雲斗間久失郎官宿郭外新添令尹墳
忽聽悲風生壠樹猶疑長嘯半空聞

雲陽葛隱君雙壽詩

句容元說葛洪家配得仙姬萼綠華幾度化龍陂上竹
尋常喂鶴鼎中砂笙吹緱嶺聲聲月衣剪茅山片片霞
待到丹成同拔宅遙空雙駕紫鸞車

戊戌除夕

獨對殘燈暗自驚世途誰復念虛名索錢有虜詩難退

祀竈無靈術未精半壁圖書先代業四隣歌管少年情
二毛豈必緣衰老只恐窮愁白易生

辦得椒盤橐已虛殘年衣褐歎全無先人墨綬空廉吏
賤子青衫只腐儒自祭詩神斟栢葉欲驅窮鬼挂桃符
燈前不改貧家樂堂上慈顏膝下雛

己亥元日

開徧梅花臘盡歸聲聲爆竹啟山扉去年愁苦將誰告
今歲平安向佛祈三徑烟霞吾獨老六街風雨客來稀

朱門通刺慵隨例自古閒身是布衣

燈燭燒殘見曙光傷情多為惜年芳無田更切三時望
有閨翻添一月忙已分狂歌惟草澤喜占春夢在池塘
生憎稚子吹蘆管落盡梅花樹樹香

同幼孺惟起由瓊河泛舟至義谿

寒風微雨共揚舲無數漁歌竹外聽浦口小洲懸半月
海門孤塔湧羅星洪濤歛勢奔歸峽衆水分流散入汀
三十六灣溪路轉一灣山色一重青

送林道魯就婚之楚婦翁王獻父時為吉藩左

相

二月春風咏標梅征衣還見錦初裁
舟經劍浦乘龍去路入衡陽捧鴈來
登合賢王新賜醴鏡開神女舊妝臺
兔園正授枚生簡年少誰當作賦才

山居漫興學晚唐

野服黃冠絕世情小齋無客罷逢迎
蜂窠衙靜如山縣蟻穴泥深似土城
雨久芭蕉心半捲春遲楊柳眼初生

只緣編得花屏好每日沿階幾度行

送朝宗上人還金山

天涯行脚偶相逢又向空門憶舊松千里月嘶春澗馬
半江雲起曉堂龍臨流獨浣歸山衲禮佛重鳴到寺鐘
聞說慈航堪度世幾時禪榻待周顒

送陳道育之官漢陽

萬里傳經入楚鄉新鶯初囀柳絲長
檀存子敬官非冷與御潘郎母可將
山色千重看大別江流九派過潯陽

座間定有三鱸墜地近嘉魚對武昌

贈呼允齡將軍

黃金橫帶氣如虹
儒雅還看郤縠同
魚鳥陣開雲變黑
鯨鯢血濺海生紅
肘懸幙府新雕印
手掛天山舊賜弓
注就陰符刁斗急
夜深燈照柳營中

錢連江尊人雙壽詩

宿應郎官接上台
歲星還傍婺星開
丹燒勾漏霞千片
酒進麻姑露一杯
琪草祇從階下長
蟠桃都向縣中栽

承家自有開門尹日日真人紫氣來

送蘇明府擢南計曹

雞舌新含入舊都幾時閩海更還珠
中年理邑方馴雉南部趨朝好聽烏
百里歌猶傳蔽芾一官清不媿萊蕪
度支若上籌邊策願賜江南一半租

送張宗道之白下

春風頻聽白門鴉匹馬驕嘶踏杏花
匣貯豐城埋後劍帆開博望泛時槎
梁間玳瑁尋盧女井角胭脂弔麗華

夜泊秦淮重買醉隔江依舊月籠沙

金山持心上人以造塔募緣入閩喜而有贈

錫杖年來徧五湖
津梁隨處度凡夫
寶沉漢水思龐蘊
金布祇園問給孤
七級月中光舍利
諸天雲裡湧浮圖
當時玉帶今何所
猶自逢人說大蘇

上楊叔向叅知

清朝騷雅見遺音
愛士常懷倒屣心
太史文章高倚馬
右軍書法得來禽
家饒美竹堪為箭
鬢有焦桐解辨琴

行部時時過劍水匣中風雨作龍吟

贈陸延平

高卧東山歲月深南來五馬又駸駸
民淳市賣雷生劍官久囊空陸賈金
頻見弓旌求草澤常看車駕舍棠陰
玉華有石還堪載不媿君家舊鬱林

延津逢許然明還武林詩以送之

相逢同是客中身雙劍延津合有神
滿樹流鶯啼去路千山羸馬送歸人
梨關月冷他鄉夢柳浪烟深故里春

訂得西湖湖上約六橋何處問垂綸

送陳二表兄重遊高州兼柬諸舊好

燈前愁賦渭城歌瘴雨蠻烟萬里歌
市得好香沉水貴
劈來新荔火山多
古祠重拜高涼洗遺殿還尋粵尉陀
往事悠悠三十載舊遊雙鬢幾人皤

送陳惟秦客恩州

客枕愁聽五嶺猿瘴江何處不消魂
羊城月送春潮上
蜺水風催夜渡喧
茉莉賣錢香滿市芭蕉成布綠連村

明知此去蠻鄉惡無奈飄零別故園

樹樹桐花夾路開思鄉還上粵王臺
裹鹽峒客投墟去沽酒蠻姬泛艇來
市肆盡傳雞骨卜垣牆多襍蠹房灰
送君解說炎方俗二十年前此地回

送邵武李太守擢憲滇南

昆明池水靜無波擁傳新從楚道過
開府定能寬漢法采詩曾不廢蠻歌
趨墟滇客龍名市納款夷王象渡河
他日勒功留片碣點蒼如黛石嵯峨

約陳伯孺仁王寺結夏效長慶

詩寄灣溪老友看今年結夏擇香壇約繡蓮藏日三卷
願飽花齋午一餐經月應酬拋竹素暫時功課借蒲團
更貪兩物堪消暑栲栳陰濃荔子丹

約薛晦叔仁王寺結夏詩以代柬

古寺幽偏少四隣樹陰蒼翠石嶙峋暫拋火宅塵中累
同結香壇世外因下界難尋消暑地平交誰是得閒身
寄詩已約灣溪叟清賞於君又一人

夏日園居和興公韻

荒園四面綠陰齊
菜甲縱橫剩幾畦
絡架瓜藤青不斷
亞簷檉葉翠難低
石堪清聽敲靈壁
茶可消煩煮建溪
坐對博山香漸滅
數聲歸鳥過窻西

一條印杖遶疎籬
正是閒行得句時
縛帚竹尋將槁葉
挿瓶花愛半開枝
多情乳燕梁間壘
無意蜘蛛屋角絲
樹影臨窻遮欲盡
晝長真與睡相宜

蔡景明叅知重遊晉安過訪山居話舊時先永

寧歿已九載尚辱垂弔感而賦此

垂老閒遊出瘴鄉居停仍喜近山房昔年圖畫蟲生卷
故主園林燕在梁眼底更誰為舊雨鬢邊無處不新霜
感君猶有山河意追念先人拜影堂

趙仁甫別駕解官歸自夔府招同陳履吉陳平
夫陳振狂集侶雲堂

草堂新築白雲間招得荷衣客往還北海芳尊傾魯酒
西窗殘燭話巴山林花乍落三開徑園柳初成五映關

蓮社正稀泉石侶愛君青鬢肯投閒

送善上人募建水月庵

托鉢他鄉度有情逢人稽首乞題名
行行水際袈裟影處處空中剪尺聲
募化不辭孤錫遠因緣休謂一錢輕
憑師悟取西來意水自澄清月自明

施仲宣司理招同鄧汝高督學飲烏石山分得
虛字

道山千尺本仙居上有孤亭接太虛
坐倚松篁頻却蓋

行過巖岫久停車洞疑大酉鴻濛外石似天丁斧鑿餘
不是能忘軒冕貴豈容蹤跡混樵漁

過黃印坤廣文故居

重過閭巷景蕭然蔓草疎花感昔年白社猶懸高士榻
青山新築廣文阡墨池久涸苔生硯玄室長扃土翳壇
唯有寒塘如半月綠波依舊繞門前

贈林子實山人

破帽鶉衣過此生放歌村落負薪行何人能識醉中趣

獨我許留身後名老去未容狂態減貧來彌覺俗緣輕
茅茨委巷逢迎少經歲不聞車馬聲

幔亭集卷九